

КАСБИ ТУМАНЛАРАРО ИҚТИСОДИЙ
СУДИНИНГ
А Ж Р И М И

(даъво аризани кўрмасдан қолдириш тўғрисида)

Миришкор тумани

2024 йил 30
апрель

Касби туманлараро иқтисодий суди судьяси Ғ.Р.Игамов раислигида, судья ёрдамчиси М.Муҳаммадиевнинг котиблигида, Ўзбекистон Республикаси Савдо-саноат палатаси Қашқадарё вилоят ҳудудий бошқармаси даъвогар "ORIGINAL COTTON MIRISHKOR" МЧЖ манфаатини кўзлаб, жавобгар - "Рахмонов Руслан" фермер хўжалигидан 14 691 291 сўм асосий қарз, 44 525 765 сўм жарима ундириш тўғрисидаги даъво аризаси бўйича ишни даъвогар вакили Ш.Махтимов (ишончнома асосида) жавобгар вакили Т.Субхонов (ишончнома асосида) иштирокида, "Агро банк" АТБ Миришкор тумани филиалининг биносида, очиқ сайёр суд мажлисида кўриб чиқиб, қуйидагиларни

а н и қ л а д и:

Ўзбекистон Республикаси Савдо-саноат палатаси Қашқадарё вилоят ҳудудий бошқармаси (бундан кейин матнда - палата деб юритилади) даъвогар "ORIGINAL COTTON MIRISHKOR" масъулияти чекланган жамияти (бундан кейин матнда - даъвогар деб юритилади) манфаатида Касби туманлараро иқтисодий судига даъво ариза билан мурожаат қилиб, жавобгар "Рахмонов Руслан" фермер хўжалиги (бундан кейин матнда - жавобгар деб юритилади)дан 14 691 291 сўм асосий қарз, 44 525 765 сўм жарима ундиришни сўраган.

Суд мажлисида иштирок этган даъвогар вакили даъво талабларини қўллаб, даъвони қаноатлантириб беришни сўради.

Суд мажлисида иштирок этган жавобгар вакили фермер хўжалиги Касби туманлараро иқтисодий судининг 2023 йил 17 июль кундаги 4-1805-2302/1633-сонли ҳал қилув қарори билан тўловга қобилиятсиз деб топилганлигини маълум қилиб, даъвогарнинг даъво талабларини кўрмасдан қолдиришни сўради.

Суд тарафлар томонидан тақдим этилган ҳужжатларда баён қилинган тушунтиришларни, эътирозларни ва (ёки) важларни текширади, далиллар билан танишади, ашёвий далилларни кўздан кечиради ва ҳал қилув қарорини қабул

қилади.

Суд юқоридаги ҳолатлардан келиб чиқиб, иш ҳужжатлари ўрганиб чиқиб, тўпланган далилларга ҳуқуқий баҳо бериб, қуйидагиларга асосан даъвони кўрмасдан қолдиришни лозим деб топади.

Иш ҳужжатларидан аниқланишича, Касби туманлараро иқтисодий судининг 4-1805-2302/1633-сонли иқтисодий иши бўйича 2023 йил

17 июлдаги ҳал қилув қарори билан "Рахмонов Руслан" фермер хўжалиги соддалаштирилган тартибда тўловга қобилиятсиз деб топилган.

ИПКнинг 107-моддаси 9-бандига кўра, жавобгарга нисбатан банкротлик тўғрисида иш қўзғатилган бўлса ва жавобгарга нисбатан тақдим этилган талаб қонунга кўра банкротлик тўғрисидаги иш доирасида кўрилиши лозим бўлса, суд даъво аризасини кўрмасдан қолдиради деб белгиланган.

Ўзбекистон Республикаси Олий судининг 2019 йил 24 майдаги

13-сонли "Биринчи инстанция суди томонидан иқтисодий процессуал қонун нормаларини қўллашнинг айрим масалалари тўғрисида"ги Қарорининг 21-бандида даъво аризасини кўрмасдан қолдириш низонинг мазмуни бўйича ҳал қилув қарори қабул қилмасдан туриб суд муҳокамасини тамомлаш шаклларида бири ҳисобланади. ИПКнинг 107-моддасида кўрсатилган даъво аризасини кўрмасдан қолдириш асосларининг рўйхати тугал ҳисобланади ва кенгайтирилган тарзда талқин қилинишига йўл қўйилмайди. Даъво аризасини кўрмасдан қолдириш тўғрисида суд ажрим чиқаради ва у ИПКнинг 108-моддаси талабларига мувофиқ бўлиши кераклиги ҳақида тушунтириш берилган.

ИПК 118-моддасининг биринчи қисмига асосан суд харажатлари ишда иштирок этувчи шахсларнинг қаноатлантирилган даъво талаблари миқдорига мутаносиб равишда уларнинг зиммасига юклатилиши белгиланган.

Баён этилганларга кўра суд, даъвони кўрмасдан қолдиришни, даъвогар ҳисобидан республика бюджетига 1 184 341,12 сўм давлат божи ундиришни, олдиндан тўланган 34.000 сўм почта харажатини даъвогар зиммасида қолдиришни лозим деб топди.

Ўзбекистон Республикаси Иқтисодий процессуал кодексининг 107, 203²-203⁴, 195-196-моддаларини қўллаб, суд

а ж р и м қ и л д и:

Ўзбекистон Республикаси Савдо-саноат палатаси Қашқадарё вилоят ҳудудий бошқармаси даъвогар "ORIGINAL COTTON MIRISHKOR" масъулияти чекланган жамияти

манфаатида берган даъво аризаси кўрмасдан қолдирилсин.

Даъвогар "ORIGINAL COTTON MIRISHKOR" масъулияти чекланган жамияти ҳисобидан республика бюджетига 1 184 341,12 сўм давлат божи ундирилсин.

Олдиндан тўланган 34.000 сўм почта харажати даъвогар зиммасида қолдирилсин.

Ажрим нусхаси тарафларга юборилсин.

Ажрим қонуний кучга киргач суд харажати қисмига ижро варақаси берилсин.

Ажримдан норози томон апелляция тартибида шикоят бериши (протест келтириши) мумкин.

Судья



Ғ.Р. Игамов